

ԿԱԶՄՎԱԾ Է 23.03.2020 թվականին

ՀԱՍՏԱՏՎԱԾ Է

«ԱՐԴԱՐԱԴԱՏՈՒԹՅԱՆ ԱԶԱԿԻՑՆԵՐԻ
ՄԻՈՒԹՅՈՒՆ»
ՀԱՍԱՐԱԿԱԿԱՆ ԿԱԶՄԱԿԵՐՊՈՒԹՅԱՆ
ԱՆԴԱՄՆԵՐԻ

ՏՊԱԳՐՎԱԾ Է 2 ՕՐԻՆԱԿԻՑ

ՕՐԻՆԱԿ 1

2020 թվականի մարտի 23-ի

Արտահերթ ընդհանուր ժողովի որոշմամբ

Նախագահ՝ Դ. Հովսեփյան



ԿԱՆՈՆԱԴՐՈՒԹՅՈՒՆ

«ՔԱՂԱՔԱՑԻԱԿԱՆ ԴԱՏԱՐԱՆ» ԱՐԲԻՏՐԱԺԱՅԻՆ ՀԻՄՆԱԴԻ

ԵՐԵՎԱՆ, 2020թ.

1. «ՔԱՂԱՔԱՑԻԱԿԱՆ ԴԱՏԱՐԱՆ» ԱՐԲԻՏՐԱԺԱՅԻՆ ՀԻՄՆԱՐԿԻ ԿԱՐԳԱՎԻՃԱԿԸ

1.1 «Արդարադատության աջակիցների միություն» հասարակական կազմակերպության (այսուհետ՝ Կազմակերպություն) «Քաղաքացիական դատարան» արբիտրաժային հիմնարկը (այսուհետ՝ Քաղաքացիական դատարան) Կազմակերպության կողմից ստեղծված վեճերի լուծմանը նպաստող մարմին է՝ հիմնարկի կարգավիճակով:

1.2 Քաղաքացիական դատարանն իր գործունեությունն իրականացնում է «Առևտրային արբիտրաժի մասին» Հայաստանի Հանրապետության օրենքի (այսուհետ՝ Օրենք), Հայաստանի Հանրապետության միջազգային պայմանագրերի, սույն կանոնադրության և Կազմակերպության ժողովի կողմից հաստատվող կանոնակարգերի հիման վրա:

1.3 Քաղաքացիական դատարանն իրավաբանական անձ չէ, այն Կազմակերպության անունից կարող է ձեռք բերել ու իրականացնել գույքային և անձնական ոչ գույքային իրավունքներ, կրել պարտականություններ:

1.4 Քաղաքացիական դատարանն ունի կլոր կնիք, ձևաթղթեր, խորհրդանիշ և անհատականացման այլ միջոցներ:

1.5 Քաղաքացիական դատարանի անվանումն է՝

հայերեն լրիվ՝ «Քաղաքացիական դատարան» արբիտրաժային հիմնարկ

կրճատ՝ «Քաղաքացիական դատարան» ԱՀ

ռուսերեն լրիվ՝ “Гражданский суд” арбитражное учреждение

ռուսերեն կրճատ՝ “Гражданский суд” АУ

անգլերեն լրիվ՝ “Civil Court” arbitration institution

կրճատ՝ “Civil Court” AI

1.6 Քաղաքացիական դատարանի գտնվելու վայրն է՝ ՀՀ, քաղաք Երևան, Չայկովսկու փողոց, 34 շենք:

2. ՔԱՂԱՔԱՑԻԱԿԱՆ ԴԱՏԱՐԱՆԻ ՍՏԵՂԾՈՒՄԸ

2.1 Քաղաքացիական դատարանը ստեղծված է համարվում Կազմակերպության ժողովի կողմից սույն կանոնադրության հաստատման պահից և ենթակա է հաշվառման օրենսդրությամբ սահմանված կարգով:

3. ՔԱՂԱՔԱՑԻԱԿԱՆ ԴԱՏԱՐԱՆԻ ԳՈՐԾՈՒՆԵՈՒԹՅԱՆ ԵՐԱՇԽԻՔՆԵՐԸ

3.1 Քաղաքացիական դատարանը ՀՀ օրենքներով և սույն կանոնադրությամբ ու իր կանոնակարգով սահմանված խնդիրների լուծման համար տիրապետում, օգտագործում և տնօրինում է իրեն ամրակցված գույքը:

3.2 ՀՀ օրենսդրությամբ և սույն կանոնադրությամբ սահմանված կարգով Քաղաքացիական դատարանի գործունեությունից առաջացած դրամական միջոցները առաջնահերթության կարգով ուղղվում են արբիտրների հոնորարների, վարչական ծախսերի և կանոնակարգով սահմանված Քաղաքացիական դատարանի այլ ծախսերի վճարմանը: Մնացած գումարը սահմանված կարգով ուղղվում է Կազմակերպության կանոնադրական նպատակների իրականացմանը:

4. ՔԱՂԱՔԱՑԻԱԿԱՆ ԴԱՏԱՐԱՆԻ ԿԱՌԱՎԱՐՈՒՄԸ

4.1 Քաղաքացիական դատարանի ընդհանուր կառավարումը, որպես հիմնադիր, իրականացնում է Կազմակերպությունը՝ ի դեմս Կազմակերպության ժողովի՝ Օրենքով և սույն կանոնադրությամբ սահմանված կարգով:

4.2 Կազմակերպության ժողովի իրավասության հարցերն են՝

4.2.1 Քաղաքացիական դատարանի կանոնադրության հաստատումը, կանոնադրությունը փոփոխելը, ինչպես նաև կանոնադրությունը նոր խմբագրությամբ հաստատելը,

4.2.2. Քաղաքացիական դատարանի կանոնակարգի, դրա փոփոխությունների հաստատումը,

4.2.3. Քաղաքացիական դատարանի նախագահի նշանակումը,

4.2.4. Քաղաքացիական դատարանի արբիտրների կազմը՝ անվանացուցակը հաստատելը, Քաղաքացիական դատարանի նախագահի տեղակալների և Քաղաքացիական դատարանի քարտուղարի նշանակումը՝ Քաղաքացիական դատարանի նախագահի ներկայացմամբ,

4.2.5. Քաղաքացիական դատարանի ծախսերի չափի, արբիտրների հոնորարների չափը հաստատելը,

4.2.6. Քաղաքացիական դատարանի գործունեության դադարեցումը,

4.2.7. ՀՀ օրենսդրությամբ և սույն կանոնադրությամբ իրեն վերապահված այլ լիազորություններ:

4.3 Քաղաքացիական դատարանի ընթացիկ գործունեությունը ղեկավարում է Քաղաքացիական դատարանի նախագահը, բացառությամբ այն հարցերի, որոնք

Օրենքով և սույն կանոնադրությամբ վերապահված են Կազմակերպության ժողովի իրավասությանը: Քաղաքացիական դատարանի նախագահի լիազորությունները սահմանվում են սույն կանոնադրությամբ և Քաղաքացիական դատարանի կանոնակարգով:

4.4 Քաղաքացիական դատարանի նախագահի և արբիտրների լիազորությունները կարող են վաղաժամկետ դադարեցվել Կազմակերպության ժողովի կողմից:

4.5 Կազմակերպության նախագահի իրավասության հարցերն են՝

4.5.1. Քաղաքացիական դատարանին ամրակցվող գույքի կազմը և չափը որոշելը,

4.5.2. Քաղաքացիական դատարանի վարչակազմակերպական կառուցվածքը և հաստիքացուցակը, ինչպես նաև Քաղաքացիական դատարանի աշխատակիցների վարձատրության չափը հաստատելը՝ Քաղաքացիական դատարանի նախագահի ներկայացմամբ,

4.6 Քաղաքացիական դատարանի նախագահը՝

4.6.1 կազմակերպում է Քաղաքացիական դատարանի ընթացիկ գործունեությունը.

4.6.2 առանց լիազորագրի ներկայացնում է Քաղաքացիական դատարանը Հայաստանի Հանրապետությունում և արտասահմանում.

4.6.3 կազմակերպում է արբիտրաժային դատավարության դատական պրակտիկայի ուսումնասիրումը և ամփոփումը, Քաղաքացիական դատարանում քննված գործերի վիճակագրության վարումը.

4.6.4 ապահովում է Քաղաքացիական դատարանի բնականոն գործունեության կազմակերպումը.

4.6.5 Քաղաքացիական դատարանի անունից իրականացնում է կանոնակարգով Քաղաքացիական դատարանին վերապահված գործառույթները,

4.6.6 կատարում է աշխատանքի բաշխում Քաղաքացիական դատարանի աշխատակիցների միջև,

4.6.7 Կազմակերպության ժողովի հաստատմանն է ներկայացնում Քաղաքացիական դատարանի գործունեության մասին տարեկան հաշվետվությունները,

4.6.8 իրականացնում է Օրենքով, սույն կանոնադրությամբ և Քաղաքացիական դատարանի կանոնակարգից բխող այլ լիազորություններ:

4.6.9 հաստատում է Քաղաքացիական դատարանի գործունեությունը կանոնակարգող ներքին փաստաթղթերը,

4.7 Քաղաքացիական դատարանի նախագահը կարող է ունենալ տեղակալներ:

4.8 Քաղաքացիական դատարանի նախագահի տեղակալների գործունեության շրջանակները սահմանվում են Քաղաքացիական դատարանի նախագահի կողմից: Քաղաքացիական դատարանի նախագահի բացակայության դեպքում նրա լիազորություններն իրականացնում է Քաղաքացիական դատարանի նախագահի տեղակալներից մեկը (առկայության դեպքում)՝ Քաղաքացիական դատարանի նախագահի նշանակմամբ:

4.9 Քաղաքացիական դատարանի նախագահին օրենքով սահմանված կարգով գույքային պատասխանատվություն է կրում իր հակաօրինական գործունեության արդյունքում Կազմակերպությանը պատճառված գույքային վնասի համար: Քաղաքացիական դատարանի նախագահի լիազորությունների դադարեցումը չի կարող հիմք հանդիսանալ պատճառված նյութական վնասը հատուցելու պարտավորությունները չկատարելու համար:

5. ՔԱՂԱՔԱՑԻԱԿԱՆ ԴԱՏԱՐԱՆԻ ԳՈՐԾՈՒՆԵՈՒԹՅԱՆ ԴԱԴԱՐԵՑՈՒՄԸ

5.1. Քաղաքացիական դատարանի գործունեությունը դարարում է ՀՀ օրենսդրությամբ սահմանված կարգով, ինչպես նաև՝ համաձայն սույն կանոնադրության:

5.2. Քաղաքացիական դատարանի գործունեությունը համարվում է դադարած՝ այդ մասին Կազմակերպության ժողովի որոշումն ուժի մեջ մտնելու պահից: